



GJYKATA SUPREME E REPUBLIKËS SË
KOSOVËS
VRHOVNI SUD REPUBLIKE KOSOVA
SUPREME COURT OF REPUBLIC OF
KOSOVO



PËR: GJYKATAT THEMELORE DHE GJYKATËN E APELIT

NGA: GJYKATA SUPREME

Q A R K O R E

LIDHUR ME ZBUTJEN E DËNIMIT

Të nderuar kryetarë, si Gjykatë Supreme kemi vërejtur një dukuri shqetësuese që po ndodhë nëpër gjykatat e Kosovës, ngase në situatat e caktuara, gjykatat po zbusin dënime, jo sipas ligjit, por sipas dëshirës së tyre.

Pothuajse në shumicën absolute të rasteve që kanë të bëjnë me vrasjen në tentativë, nga neni 178 apo vrasje e rëndë në tentativë, nga neni 179, gjykatat nuk respektojnë dispozitat për zbutje të dënimit, dhe dënimet po i zbusin sipas dëshirës së tyre, jo sipas normës ligjore. Është për të ardhur keq, se Gjykata e Apelit, në vend që të evitojë këtë dukuri, si gjykatë e shkallës së dytë, edhe vet po vepron në kundërshtim me ligjin, pasi në raste të caktuara ka aprovuar ankesën për vepra të këtilla penale dhe ka ndryshuar dënimet duke ua zbutur nën kufirin e lejueshëm me ligj, për zbutje.

Sipas nenit 76.par.1.pika 1.1 të KPK, kur për veprën penale, si masë më e ulët e dënimit (d.m.th., minimumi i posaçëm), është paraparë dënimi me së paku 10 vjet burgim, dënimi mund të zbutet deri në pesë (5) vjet.

Sipas pikës 1.2 të nenit të cituar, kur për veprën penale si masë më e ulët e dënimit (d.m.th., minimumi i posaçëm) është paraparë dënimi me së paku pesë(5) vjet burgim, dënimi mund të zbutet deri në tri (3) vjet.

Sipas neni 28.par.3 të KPK, për tentativë, kryesi dënohet sikur ta kishte përfunduar veprën penale, por mund të dënohet edhe më butë.

Sipas ligjit , rezulton se në asnjë variant, për vepër penale, vrasje në tentativë, nga neni 179 të KPK, dënimi nuk mund të zbutet nën pesë(5) vjet dhe nën tri (3) vjet, për vrasje në tentativë, nga neni 178 i KPK.

Zbutja e dënimit nën këto limite ligjore, vendimin e bënë arbitrar- qëllimisht të kundërligjshëm, ngase gjyqtari i tejkalon autorizimet që i ka me ligj. Gjykatat mund të aplikojnë institutin e zbutjes së dënimit, e lirimit nga dënimi etj., vetën në suaza të mundësive ligjore, e jo sipas dëshirës së gjyqtarit. Nëse krijohet një praktikë e tillë (fatkeqësisht, po rezulton se është krijuar), që gjykatat të zbusin dënimet sipas dëshirës së tyre, e jo sipas ligjit, më s'bëhet fjalë për sundim të ligjit, por për arbitrarizëm.

Të nderuar kryetarë, kërkoj nga Ju, që këtë çështje, ta diskutoni me gjyqtarët që punojnë në krimet e rënda, dhe të kërkonin nga ata, që dënimet t'i zbusin, kur përmbushen kushtet ligjore, vetëm në suaza të limiteve ligjore, NË TË KUNDËRTËN, vendimet dalin të jenë qëllimisht të kundërligjshme.

Ju falënderoj për bashkëpunim dhe mirëkuptim.

Me respekt,

Prof.dr. Fejzullah Hasani

Fejzullah Hasani

Kryetar i Gjykatës Supreme të Republikës së Kosovës